

晚

晴

移

詩

匯

晚晴移詩匯卷四十二目錄

李來泰 八首

潘耒 十五首

沈珩 一首

米漢雯 四首

黃與堅 七首

李鎧 一首

徐鉞 十五首

沈筠 一首

范必瑛 一首

崔如岳 一首

張鵬烈 一首

方象瑛 二首

李澄中 十首

吳元龍 二首

龐塏 十首

吳任臣 一首

毛升芳 一首

曹禾 十二首

黎騫 一首

高詠 四首

龍燮 十三首

邵遠平 二首

嚴繩孫 九首

晚晴簃詩匯卷四十二

徐世昌

李來泰字仲章號石臺臨川人順治壬辰進士歷官江
南蘇松常道康熙己未召試博學鴻詞授侍講遷侍
讀有蓮龕集

詩話石臺詩文俱雅潔居官有聲錢牧齋
爲作去思記試鴻博後未幾卒人咸惜之

湖口

舊日題名處春風又綠蕪合流江九派砥柱石雙孤樹色
遙分楚舟行已盡吳只慚漁父問能賦石鐘無

輓鄭寶水參藩

聞道心如水遺風滿八閩山川存正氣湖海識遺民太息
壺頭日淒涼谷口辰東南耆舊盡哀些若爲陳

爲吳起凡贈許貞甫南還

六載煙塵暗江嶺雕闌十二春無主纍纍軍前半死生桃
花血漬燕支土落花飛絮總成塵青冢還留現在身祇驚
赤白囊中羽誤作丹青畫裏因高陽老人能任俠間關萬
里隨俘獲氣激情親解動人相逢燕市悲歌客白頭宮監
住京華忼慨曾傳古押衙金錢自繫將軍樹婉變時迴阿
母車感君高誼爲君起盡解金羈脫胥靡從知今日慶其
蘇敢憶當年歎如燬別有延陵一片心鶯雛燕老信沈沈
與君同和南飛曲脫葉隨風識故林

舟中晚晴

霖鈴歌徧溼金微倚櫂初迎翠影微喜近月輪添暮色還
占風角問朝暉黏雲修尾垂垂下貼水輕翎欸欸飛見說

江天方晚照沙邊重理綠蓑衣

覺塵余故人子也以僧來謁書此贈之

昔年曾訪王官谷故苑飄零事已非爲問故人誰白髮忽
驚孺子變緇衣江湖道遠麋能逸邱壑心存鵠自違太息
廿年塵土夢鈍根未解箭鋒機

王西屏先生虔事佛母得異木備巖壑之奇用承跌
坐以頌賦見示爲題二章

異植疑分自竺騰浮來跌下見奇徵賦心詎止拈枯樹象
教應如頌古藤體具真形圖五嶽坐移光影悟千鐙何時
親展楞伽路認取香巖最上層

盈笏都將萬象含真如莖草建精藍疆藏蠻觸圖難盡蟄
隱蛟螭氣尙酣祕笥渾疑開篆籀鑪煙長爲起雲嵐知君

胸具閒邱壑來與維摩共一龕

題海虞邵氏草花圖

竹枝歌斷楚雲殷拾取江蘅杜若還卻笑當年黃子久只將癡筆寫虞山

潘耒字次耕號稼堂吳江人康熙己未召試博學鴻詞

授檢討有遂初堂集

沈歸愚曰稼堂先生篤於師門少師徐侯齋顧亭林兩先生侯齋沒周卹其孤孫刻亭林日知錄及詩文集此誼猶近古人詩筆直達所見浩氣空行韻語可作古文讀而登臨懷古諸作尤爲光燄騰上一時名流幾罕與儷者

詩話稼堂師皆遺宿兄死史難巖棲谷隱若將終焉應大科入詞館良非始願赴召時有寫懷詩二十首具述出處本末既授職復牒吏部乞放還未允及挂彈事又作續寫懷六首遂南歸出游贛粵齊魯浙閩楚豫周覽五嶺泰岱台蕩武夷黃山匡廬嵩少衡湘諸勝游屐所經留題殆徧康熙癸未迎蹕復官越三

年復南巡澤州相國將薦起稼堂作老馬行以謝竟
不復出詩以議論勝硬語盤空縱橫曲折無不如志
猶能緯以聲律澤以文藻固
不至落以文爲詩科臼也

卦山

卦山交山陽孤峯獨崔嵬下眺一氣中稜稜露巖崖森如
六爻列錯若萬卦排我來正雪霽寒空無纖埃羣峯皎練
明萬柏攢一蒼遠見介山巔干霄白皚皚近矚交城城微
茫辨樓臺文峪下西谿汾川自東來連山走黃河屏展卻
抱迴誰言萬家縣形勢亦壯哉守險在良牧濟世須雄才
利鐵錮窮巖健馬嘶風哀劉淵亦何人石匣爲之開蒼天
不可問浩歌舒遠懷

忻州嬰杵廟

烈士不愛生亦不鹵莽死苟生顏面羞徒死魂魄恥生死

各有立機括妙相倚嬰杵得其深一髮存趙祀千夫共興
瓢不如道旁委兩人利斷金同心而殊軌間牒有陰陽奇
正相表裏神鬼未能窺宵小安足擬趙朔亦何人得士有
如此驅車出忻州酌酒弔故里秋風正蕭騷浩歌熱雙耳
帶兆雖中絕巢卵豈俱毀藏山不可求哀哀哭公子

古人貴成事今人貴成名義聲豈不美躁取事或傾吾心
在千秋旦暮安足爭太史傭法章丙吉不自明生潼聞李
善賣卜有王成短錐詢楚隸漏船舞吳兵奇巧千萬端權
輿於杵嬰精誠生智術狡獪不足驚死生判難易當時費
權衡功成終下報命乃鴻毛輕爲難勿藉口君子守其經

西冷展墓

三尺蓬科幾樹梅梅根碧血總成苔春山雨露僧時到畫

角昏黃鶴一來入夢有人迷北海招魂無地哭西臺鴟夷
未化錢塘水莫怪潮聲夜夜雷

麥飯椒漿拜草間相看應怪我蒼顏休疑陸弟曾如洛爲
報梁童已出關將母歸來無舊業藏書到處有名山西征
賦就何人賞焚向東風血淚斑

贈杜于皇

男兒無家復無國六合飄然一孤客客行落落雲出岑其
去無跡來無心山水佳處便淹泊偶然相遇不可尋黃岡
先生古豪士胸吞雲夢八千里神鷹鍛翮不得飛丹霄碧
海將安歸三十年來泛江舸大塊無塵能著我商山須眉
大澤裘游戲人間無不可往年訪友揚州城州人喧呼看
歲星如雲冠蓋趨門庭先生酣眠醉不醒醒來洗眼焦山

青金焦如螺意不快一葉翩然下江瀨青邱方壺不可期
白龍赤鯉遙相待我亦汗漫之遐方束髮結交多老蒼惟
翁差也未識面江雲關樹空相望錫山葉脫蠡湖朗散步
禪房見叩杖怪來避地已經年笑我勞勞逐塵鞅昆明劫
火方洞然老黿抃山波接天土偶桃人莫相笑久客會有
還山年先生無事但宴眠大瓢滿酌清冷泉君不見君家
杜陵喪家者茅屋秋風淚盈把揮淚高歌洗兵馬

贈錢飲光

蹠血生還萬里天土牀樹屋尙依然箋餘易象研朱細踏
徧雲山著屐便久矣泥塗書亥字淒其衰白感丁年誰憐
靈武麻鞋叟老向空山拜杜鵑

畫松歌爲梅瞿山作

畫松不難與松似貴得寒空磊落意一片梢雲拂雪姿巍
峨迴與凡柯異梅君都官之後人才華標格都絕塵善畫
尤工作松樹寸管貌出千龍鱗孤根直幹勢奇矯煙濤漠
漠開清曉直如白虹亙晴霄怒如蒼龍作鱗爪端如巖廊
坐偉人高如深林出遺老一氣淋漓入化工千尋錯落舒
懷抱畢宏韋偃不可追粉本豈是人工爲十年看松甫落
筆黃山萬樹爲君師黃山之松信奇絕太古以來無斬伐
十步蟠拏九步折行空偃地無罅缺撐撐巖崖礙日月嗟
我不得掉臂行游於其間塵沙日夕彫壯顏徒對慈仁兩
禿幹朝行婆娑暮忘還梅君何當訪爾就茅屋抱琴醉枕
松根宿看君作畫題詩老亦足

二姜先生祠

軾轍齊名世早知百年忠義繫人思忠傳折檻排奸日義
想銜刀伏闕時兩地青燐埋宿草一山紅樹妥新祠吳門
野老多相識雪涕爭看幼婦碑

經姜給諫墓作

青峯一曲抱愁雲中有先朝諫議墳往日兒童識鄒浩到
今野老哭劉蕡山頭樹屋稱殘卒地下戎衣見故君埋骨
便爲乾淨土豐碑華表漫紛紜

馬當山

飛帆如箭劈流開遙奠江神酒一杯好風肯與王郎便世
上惟君不妒才

羊城雜詠

匡山尙住宋遺民文陸當年事苦辛窮海不春猶正朔孤

航無土自君臣忠魂鬱作潮頭怒浩氣蒸成蜃闕新異代
流風多感激草間時有納肝人

萬年橋

舊傳吳胥門有橋甚雄壯不知何當事諂媚分宜相拆毀
遠送之未悉其真妄茲來經秀江巍橋儼在望橫鋪八九
筵袤亘數十丈石質盡堅珉蹲獅屹相向皆言自蘇來運
載以漕舫嚴老自撰碑亦頗言其狀始知語不虛世事多
奇創橋梁是何物乃作權門餉鞭石與驅山勢力豈多讓
充此何不爲穹天一手障爲德於鄉里或云差可諒不聞
掠彼衣而令此挾纊冰山一朝摧籍沒無留藏獨此巋然
存千秋截江漲頌詈雨不磨功罪亦相當猶勝庸庸流片
善無足況吳山多佳石胥江足良匠有能更作橋舊式猶

可做

泛洞庭湖

九江瀦一湖占地楚封半名城十二三微茫綴湖畔夏秋水盛時涵天四無岸中流吐日星餘波沸江漢我行值仲冬水落勢平漫猶然浩無涯道里不可算安鄉抵巴陵淹泊屢昏旦眠餐蛟龍窟偃息馮夷館風濤猛堪驚雲物奇可翫霞蒸錦鮮新日燦金燦爛水浮玻璃天山橫青玉案帆移畏迴颺雁度愁弱翰域中標五湖雄奇此爲冠平生慕圖詠及茲窮壯觀最喜流潦清客水盡消散全湖露眞形山川見條貫惟湖有容德不盈亦不嘆世人昧遠覽臨流畏湍悍不有大壑瀦數州盡沈瀣配瀆能停滯比海齊浩瀚愧無郭木才神功莫能贊亭毒思化源望洋但三歎

水車

世間大巧不自用，用物之力因自然。力大無過風，與水驅使有。道天無權帆，檣輻輳皆聖作。水車奇妙尤無前，築防壅水令湍悍。衝波蹙踏車輪旋，輪廣丈餘貫以軸。編筒其上巧在偏，仰則吸水俯吐水。如瓶傾瀉簷溜懸，剗木爲槽受其吐。駕空行遠歸於田，神龍捲波謝迅疾。霖雨注地輪連綿，晝翻夜運不暫息。無人守視常轉圜，溪丁作碓舂米穀。山僧修篋行清泉，一家一戶自便利。豈如普潤澤不專，漢陰文人戒機事。此非私智天機全，於人無爭物無損。其器可守法可傳，吳淞水平不可激。夔蛇相視休相憐，但安桔槔守拙鈍。勤苦亦自邀豐年。

沈珩字昭子號耿巖海甯人康熙甲辰進士官內閣中

書己未召試博學鴻詞授編修

讌集真如塔院懷曹秋岳先生

兩國人文會岷峨本競高於今江左席孰與謝公豪霜染秣陵樹波傳胥嶺濤盤空同極目延望主風騷

米漢雯字紫來號秀巖宛平人順治辛丑進士官長葛知縣行取主事康熙己未召試博學鴻詞授編修遷侍講有漫園詩集始存集

詩話紫來好學工詩善畫兼擅小令金石篆刻皆精絕書學米南宮徑寸外者尤勁媚當時呼爲小米汪堯峯稱其天才造詣在其祖父友石先生上香祖筆記謂紫來詩爲書畫所掩畿輔詩傳錄得四首僅其一鱗爪而已

送徐次履還宣城

弱齡事章句縞紵慕疇昔思與賢豪人盟心矢金石江南

今日有徐子藉甚詩名推正始到來爲結忘年交魏都高
宴差堪擬每逢予唱必和歌蕭寺空齋取次過登高共草
銀鏤管遙夜同傾金叵羅三時去我如過翼世事悠悠那
終極酒酣擊筑呼嗚嗚搔首問天長太息素心自問久爲
羣促膝披襟細論文囊中瓊玖投將徧君言歸卧姑山雲
姑山崔嵬勢無敵四時蒼翠常如滴謝朓青山俯碧湍謫
仙樓閣臨丹壁知君卜築枕通川松竹盤紆薜荔連長風
密谷朝舒嘯皎月清溪夜扣舷自是此鄉饒足樂留君不
住懷殊惡灞上長條慘客裝草堂梁月愁羅幕行程況復
正當秋雲白楓丹雁影稠更持此日驚人句爲寄長安諸
舊游

伯璣新成小舫邀游東湖次韻

扁舟如小閣列坐豁塵襟待月移蘆港追涼繫柳陰客貽
新製茗鄰借舊藏琴蘇圃遺蹤在千秋共素心

淦陽道中

遠近和鳴雞朝暉望欲迷波環隄左右地似灤東西柳影
藏鳬隊荷香送馬蹏賞心隨命酌村酒正堪攜

送張松樵鍊師還廬山

竟謝浮榮覓紫芝好山深處結茅茨伯英家法原能草粟
里遺民更有詩時踏青蒼舒朗嘯未忘黑白一彈棋匡廬
到處懸飛瀑可許支筇共問奇

黃與堅字庭表號忍庵太倉人順治己亥進士官知縣
康熙己未召試博學鴻詞授編修歷官贊善有忍庵

集

錢牧齋曰忍庵長安金陵維感諸篇頓挫鉤鎖

纏綿排側風情骨格在韓致堯元裕之間

詩話忍庵早慧入歲卽好唐人詩自錄小本少長嗜

古學徧讀周秦至六朝書其詩爲錢牧齋吳梅村所

稱名列太倉十子中詞條豐蔚

壯麗而有情韻幾社遺風未墜

辰龍關

鬱盤鳥道中忽覩巉巖削雙聳若天門神工斧斤鑿攢刺
劍戟橫摩厲成鋒鏑青冥杳無垠怪雨從空落一徑折霄
光絕壁盡倒卻干仞蹙孤危不敢棲猿猱攀躋坂益敝數
武困行腳嗤彼銅馬餘持鎧倚木閣狼竄嶮一峒俄就官
軍縛於今走輕車亭午氣頽索白日景蔽虧一步一獮惡
瞬息度層關鬚鬢恐非昨

聞礮

萬井西風下城高一葉飛可憐今夜月重搗去年衣聽亂

情交切聲疏力漸稀異鄉刀尺冷多少客思歸

金陵雜感

勅選良家降墨封玉車輕幘進昭容
花開並蒂鴛鴦暝酒醉同心琥珀濃
蕭寺鼓聲驚翡翠蔣山風雪葬芙蓉
飄零故劍秋江上回首長干冷暮鐘

龍虎鍾山百戰雄朔風吹浪下朦朧
彤戈壓陣黃沙斷鐵鎖沈江赤燒空
鳩鵲觀消春雪裏鳳凰臺冷暮雲中
由來帝業終荒草銅狄何曾戀漢宮

沂州客店遇同鄉友人

江郭蕭條尙苦兵訝君北走得班荆
地懸淮海艱消息人歷冰霜倍老成
同話寂寥皆逆旅兩經離亂卽餘生
故園風物那堪問但說梅花已繫情

功臣山

鬱盤松徑偃青蒼
螯石猶看廢苑牆
鴉噪斷橋驥裏絕
草埋簪井輓轡荒
王宮滅沒餘坏土
霸業銷沈付夕陽
爭似普光遺塔在
路人指點客徬徨

婆留井

綠莎縈繞水澄清
荒井翻因得大名
怪道眞王身不死
水犀萬弩射潮平

李鎧字公凱號惺庵江南山陽人順治辛丑進士康熙
己未召試博學鴻詞授編修歷官內閣學士有恪素
堂集

丹陽道上

曉入雲陽道喧呼次第行
山空看日上江近覺潮生
客路

貪斯競人心淡自平扁舟隨泛泛亦足赴王程

徐鉉字電發號虹亭吳江人監生康熙己未召試博學

鴻詞授檢討有南州草堂集

詩話電發弱冠天才駿發下筆數千言龔芝麓極賞之工倚聲輯詞苑叢談十三卷晚年續唐人孟棻本

事詩皆取緣情綺靡之作嘗刻菊莊樂府

朝鮮貢使仇元吉貽以書以餅金購之去

登燕子磯

危磯萬仞鬱嵯峨吳楚青蒼入望多潮壓上流江郢闕天
連平遠片帆過景陽兵合鐘初斷玉樹歌殘水自波幾見
新亭重灑淚夕陽終古歎漁蓑

眞乘寺散步有感

寺在太湖縣

廢寺殘碑鎖綠苔客懷羈寂好誰開欲追勝事尋仙迹
山中有八仙碁局先覓眞乘上講臺雲起司空回翠壁天連衡岳

壓黃梅地與湖廣接界不堪指點前朝事猶有胡僧話劫灰僧言
張獻忠破城之後寺被
殘燬今殿基僅餘瓦礫

淮行

藕花蕭瑟野塘幽五月淮行氣似秋橋市魚蝦爭換酒水
田芋粟半盈舟雲移楚甸孤帆冷樹老隋隄片月留莫向
韓祠怨衰草漢家陵廟已荒邱

聊城

聞說聊城箭曾傳燕將書孤危忠乃見反覆志安居但計
奇功就終成霸業餘未因蹈東海國士豈關渠

送侯大年還江南

時大年欲再至山東

黃沙吹風暗京國行子對面不相識躑躅難尋故舊歡終
日城南望城北忽逢侯生市上來駐馬相攜飲百杯十年

傾倒足懷抱長沙富貴何有哉怒馬高車去如駛五侯七
貴今如此落拓誰留一布衣羈縻且共居蕭寺蕭寺論詩
晝掩門每當風雨坐朝昏一飯未曾遇知己何況當年國
士恩余昨偶從山東來君今又向山東去回首方思泰岱
雲別離無那燕臺樹燕臺樹下淚如綫此行羨子歸鄉縣
閣上如逢揚子雲道余挾策猶貧賤謂既庭師也

慈仁寺雙松歌

我昔曾游泰岱間秦松漢柏相追攀霜皮剝落幾千載雷
雨晝黑垂空山我今走馬慈仁寺便欲追尋憐好事金元
遺迹雙樹存未知何人始位置天鵝鴈風正北來虬龍倒
影拂蒼苔白日沈沈不照地靜聞竽籟猶悲哀長安棟梁
盡材傑獨爾嶙峋凍欲裂慘澹雖遭風雪欺槎牙不受煙

霜折吁嗟此松何拳跼豈逐疏頑死巖谷安得商山四老
翁長歌與汝紫芝曲

題方邵村畫青藤古塢圖

第六橋頭花正飛雲居洞口鶯亂哢晶簾如水展圖畫青

藤窈窕蚺螭垂千曲盤拏胃石骨會稽曾種田水月

山陰徐渭

號田水月築青藤書屋

治湄主人復好奇煙霞自抱龍蛇窟十年結

屋恆山巔青羊白鶴時周旋一朝獻策挾手板雙鳬忽墜

西湖邊薜荔含顰山鬼嘯陶公謝客稱同調夜月彈琴玉

樹涼相羊直欲凌壺嶠自言此圖貌故山松花落盡藤蘿

斑龍眠妙手今周昉細皴巨劈摹荆關吁嗟方干舊是神

仙姿鳴珂曳組黃金墀玉河煙樹春如夢遊戲人間稱畫

師方舊官侍御

青藤治湄好風格尤喜雄談兼岸幘薦月松陰

少閉關柏臺蘭省終前席我家南州舊草堂免葵燕麥俱
荒涼何當從君乞數行竟須歸種洞庭傍

歸太僕祠堂歌

千古文章歎薪積腐遷班掾爭辟易倔彊簡傲豈無才歐
柳曾王中繩尺百餘年來歸震川遺經自抱荒江邊瑯琊
濟南互撐拄餘子碌碌紛眼前甫里先生是吾師論文得
失寸心知披榛逆旅捫遺跡瓣香遙擲傍人嗤此事微茫
已十載瓦礫霜濃猶不改黃州學士今最賢建植華堂發
深慨雪難釣叟持相聞意氣難隨宿草堙請看奇士侯芭
識那可悠悠與俗論太息風煙迴鉅鹿絕爨茅齋蔽荒竹
寂寞婁江一片雲年年飛傍太行麓

游虎跑泉寺

山路馥幽花探泉入谿谷藍輿過寺門石骨亂飛瀑跨澗
飲列虹方池浸寒玉朱鱗戲碧波翠蘚上斑竹紺殿俯冬
青齊奉古天竺攜樽塔院西野梅傍山麓因想坡公游葛
巾連野服引瓷夜月涼樹下茶經續甘冽賽中冷七碗驅
煩濁余亦挂詩瓢聊步古人躅藉此一泓清鑑彼鬚眉綠

曉發衢州

曉月催征櫂溪喧浪不平霧籠嵐變幻灘急水縱橫曲岸
蒼煙黑遙山埃火明短篷孤枕上一夢覺鷗輕

九日同晉江黃俞邵會稽羅宏載牂牁江辰六黃山
江夢得黑窰廠登高歸飲夢得寓齋同賦

眼前好景重陽節羸馬難尋郭隗臺碣石晴雲宮樹迴燕
山積翠鳳城開深杯坐惜持螯會短髮羞稱獻賦才歸步

天街涼似水月明清露滿高槐

孟冬五日偕宮聲舟次頌嘉暨家勝力兄集石林寓

齋小飲限鞠字韻

微霜薄庭除晴霧籠朝旭寒鴉過苑牆朝罷相休沐閤戶
祕珠宮怪鴟嚇鶩鴛殘碑卧牆陰落葉疑蘧谷索米恆苦
飢誰人解幽獨好友急相招得飲快所欲亟命巾車來入
門把叢菊斐几竹榻邊茶鐱湘簾曲圖史架上陳差強牛
背讀賦字怕生疏詩句嫌慣熟雅志薄風騷高懷洗齷齪
同時三四人相對無拘束嘉穀薦五簋家釀傾十斛據案
奪臬盧葛巾不用漉錢子發雄談慷慨漸離筑曹公氣疏
闊爲我豁煩促橫槊仍賦詩哀音比戛玉狂態遜汪倫螯
弧共爭逐論文口詼嘲白眼笑家督主人喬石林頽然惟

捫腹新月挂銀鉤垂簾燒短燭街鼓正統統猶覓舫船覆
潦倒步前楹歸路嗤僮僕萬事等浮雲世情嗟轉轂不飲
竟何爲雙鬢豈終綠

憶昔行送江辰六之任益陽兼柬羅宏載

憶昔征車來紫陌與君同作長安客把臂相歡意顛倒蕭
寺逢迎無促戚朱提賜出天府金日飽太倉米一粒江東
羅髯氣正豪擊鉢聯吟醉書壁臘殘凍雪澆濁醪袖出黃
柑手親擘明年獻賦太和殿而我三人同載筆我誠忝竊
君拂衣此心原不負車笠羅髯參幕去熊湘時宏載入韓撫軍幕君
向酒壚還岸幘每逢得失話升沈襟期磊落開胸臆目今
滇黔將蕩平聖主求賢方側席急須循吏撫殘黎君幸彈
冠仍捧檄黃陵苦竹煙雨深稍喜年來烽火熄桃花江岸

子規嘯馴雉朝飛藏秀麥問俗重尋岳麓碑行春遙過賈
生宅且從宓子事彈琴漫學陶潛歸種秫君才於世無不
宜治行終當推第一奏最何勞歲月深行見鋒車早晚出
儻從君府遇羅髯爲道相思憶疇昔

登丹鳳樓和楊鐵崖原韻

樓在上海縣東北天妃宮宋臧湑中建後燬明萬曆

間里人秦侍御嘉楫擴城樓爲之

危樓千尺傍雲梯簾卷晴空雉堞齊丹鳳朝飛銀漢接蒼
鯨夜吼海天低潮聲欲落青鸞杳樹色全荒杜宇嘯笑問
三姑尋弱水長川東注幾曾西

夾江

夾束江逾急沙圍殘堞存林深虎多跡山冷翠當門野樹
重遮塢泉流曲抱村孤舟一線入嵐氣變朝昏

沈筠字開平仁和人康熙己未進士改庶吉士是歲召
試博學鴻詞授編修有斗虹集

送趙恆夫司權邦關

含香建禮識英名視權新持使節行薊北暫移琴鶴去竹
西長聽管絃聲從教篴篴登天府自有文章繼漢京最羨
風流官閣底梅花一樹賦初成

范必英原名雲威字龍僊一字秀實號伏庵長洲人康
熙己未召試博學鴻詞授檢討

湖浦

晚步已窮雲水地何人小築傍湖陰穿村正喜迎楓葉問
菊翻成到竹林隔浦山低嫌浪闊遠帆風定覺秋深緣知
落日堪乘興少伯扁舟未可尋

崔如岳字宗五號雪峯獲鹿人康熙乙卯舉人已未召
試博學鴻詞授檢討

省耕詩

聖主重民事農官占歲祥蒼龍舒異瑞朱鳥煥春陽南畝
靑旗燦東方紫氣昌民間舒疾苦天上沛恩光雨露沾人
普乾坤福物長旋生歡忭色頓覺籽耘忙耕九無他慮餘
三有積倉閭閻聞舞蹈俯仰頌虞唐百二邦畿重十千編
戶強紉轅輪玉粒黛耜壯金湯督稼資軍實省耕籌歲荒
鳥含佳種至雲拂野花香秀草隨時發嘉禾與日芳四郊
歌幹止九土荷安康草野勤劬篤仁君愛育彰蠲租欣曠
典履畝賦新章慶集丹霞迴風和玉輦翔千官羅淑景多
士詠思皇秉耒田家子橫經稽古郎爲傳天子意抒悃矢

賡揚

張鴻烈字毅文江南山陽人康熙己未召試博學鴻詞授檢討歷官大理寺副

月夜抵富陽

涼颼吹布颿新月映遐浦崖谷杳蒼翠蕭條肅孤旅林暝樵火微江靜山容古纔歷漁浦潭忽到富春渚客懷正紛錯肆矚久延佇惜哉孫伯符霸業歸何所

方象瑛字渭仁遂安人康熙丁未進士己未召試博學鴻詞授編修有健松齋集

龍洞背

神龍穿石飛洞壑晝常晦人乃捷於龍盤旋出龍背躡衣入重雲勢與風雨會危崖千萬狀不知始何代突兀浮圖

高縱橫屏幃大鱗蠶樹干章泉流吐飛沫下注不測溪沈
沈氣冥昧儻然牛渚犀百靈宛然在羌山多靈奇策名此
爲最何必御風行曠然天地外

七盤關

雞頭關前七盤嶺蚓曲蛇蟠纔見頂氏中又復度七盤詰
屈紆迴勢相引層崖邃谷路轉通拾級忽見雲霞空卻怪
頂觸前人趾不知舉膝當心胸甯心息魄詫奇絕萬里山
川風氣別一關中斷隴蜀分羌笛渝歌乍相接遙望川巴
萬點明白雲紫霧還縱橫鱗鱗彷彿峨眉雪不知何處錦
官城北望京華南望越懷人兩地情偏切今朝身入大荒
西涼風古驛中秋月

李澄中字渭清號漁村又號雷田諸城人康熙壬子拔

貢已未召試博學鴻詞授檢討厯官侍讀有卧象山

房集

詩話漁村生時父夢李于鱗入室及長又嘗夢人授一卷文字曰此汝作也醒記數語是于鱗華山記中語劉子羽見于鱗畫象亦謂漁村與相似專力爲詩以漢魏三唐爲宗高岸開朗仍效于鱗體也

送宋稚恭省覲歸淮南

秋風塞外來吹我燕山樹草色青以蒼中有還鄉路昨歲京洛塵與君始相遇抗懷見古人論文表情懷行世互箴規常恐多謬誤脂車感明發告別一何遽君有垂白親倚閨愁日暮人生天地間孝友非細故挽綬卽送行欲去屢迴顧去去感人情壯年乃孺慕

自栗子關十里至迴龍閣遇雨作

谷口自詰曲關勢何嶮從十步九回折磴道連蒼穹雜樹

澗忽滿幽樛青濛濛數折至絕頂開闔無始終下見沅江
水沿洞循谷中鳥道挂一綫下上如蠶叢與人聲號呼側
足臨蛟宮十里見傑閣迴龍盤虛空秋色昨夜至颯沓來
長風關門飛急雨濺沫懸玉虹咫尺路已絕豁達山巖通
歇馬投古驛解衣聞秋蟲

與齊貞吉家德公伯含卧衡飲祖家園水亭以心遠
地自偏爲韻

京洛多緇塵一水忽無地雲構俯澄瀾助我濠濮意微風
散淪漪修鱗躍荷芰安得木蘭舟陶然成獨醉倚檻望西
山夕陽落空翠

初晴張蓬海石門兄弟過荷隄

遠來踏草煙鬚眉帶秋色村村改舊容始知風雨力俯仰

剩此亭高天爲我德殘荷挺孤房柳靜溪光直稼穡乃民
命豐歉在頃刻君聽寒蟬聲已爲霜露得

仗劍行

男兒萬事在懷抱行年四十恥言老腰間劍珮七寶裝辭
家東出漁陽道漁陽少年多不平寶劍化作蒼龍精出匣
霜風動鱗甲黃金作靶曼胡纓酒酣上馬肝腸熱報讐亂
灑桃花血月下提舞向猿公萬里關河散冰雪虎皮甲袖
錦戰袍劍光直拂秋雲高此物真堪獻天子安可棄擲空
江皋謁入金門挂秋水封豕長蛇不敢起雄心期斷佞人
跡俠骨肯逐侯生死昔曾斬蛟長橋頭仗策今從赤帝游
古來神物須大用笑殺馮驩但蒯緱

送學士張敦復先生假歸縱陽

休沐成歸計，離心問落花。幾年依日月，此去且煙霞。樹裏江帆隱，雲邊驛路斜。懸知懷友夢，時復到京華。

七夕吳志伊檢討見過小飲

七夕終朝雨，涼風起竹扉。斜陽隨客至，濁酒過牆希。命拙身還健，鄉遙夢不歸。相留憐夜永，清露正微微。

答趙壺石象山松下見懷原韻

別後桃花幾徧開，舊題石壁長莓苔。屋梁月落天南北，山路雲深夢往來。幽洞尙留尋勝屐，故人多負出羣材。鬚眉空向他鄉老，好護新松待我回。

寄龍標施秉

醉裏誰堪憶故鄉，春風萬里共垂楊。衡陽南去無征雁，何處青山是夜郎。

新店驛雨後口占

輕輿曉向山背行
千山萬山雲氣生
潺湲客夢一夜雨
四十八渡皆秋聲

吳元龍字長人江南華亭人康熙甲辰進士改庶吉士
歷官工部郎中己未召試博學鴻詞授侍講有問月
堂詩鈔

虎牙關坐月

雨後來殘月江潭落影寒
亂山同一照險路幾回看
客淚驚秋老哀蟲絮夜闌
柝聲常不寐未許旅魂安

九日偕貴陽諸使君東山登高

萬里登高日千峯縱目初
天長迷近遠雲合失崎嶇
邊徼蠻歌起荒城落木疏
鄉心付征雁可許達音書

龐塏字霽公號雪崖任邱人康熙乙卯舉人已未召試

博學鴻詞授檢討歷官建甯知府有叢碧山房詩集

詩話雪崖以孝廉舉大科入詞館居數年試詞賦殿上稱旨改中書歷工部兩曹出守有惠政時父年八十餘乞養歸論詩主抒寫性情從胸中自在流出集爲所自訂一歲恆得二三卷幾於無日不詩詩名傳修潔絕無矜聲銜色冲融演迤而一歸於雅正

山寺

荒磴苔乾屐齒輕寺門晴鎖午煙平灘聲靜抱香臺轉雲氣虛從古殿生行徑嘗留馴鹿跡題牆偶見故人名老僧只解蒲團坐無數松杉一磬聲

聽寓上人彈琴

肅肅日初出烏雀寂不鳴上人理眞性拂絃奏古聲聲古神亦穆泠泠發孤清乍疑千萬山逼向戶牖生又如秋月

下徐聞溪水行冥漱有殊致厯落難強名座客齊所向恬
澹以爲情曲終而指歇音響仍未停

渡易水

歎息荆卿去蕭蕭易水秋定知遺恨在不肯向西流

送春日集張雲子齋中得風字

飛花落絮滿晴空九十春歸悵晚風草色空傷南浦外鶯
聲欲斷夕陽中尊前把酒憐將老愁裏題詩愧未工莫撫
清琴操別鵠感時懷土正無窮

雙鵝篇

新河宋登春以詩隱明嘉隆時號鵝池生康熙辛酉柘城王培來令新河題碑表其故里

夜有二鵝止碑上居人以獻培鑿池畜之吾友周岷公見其事爲余道之

在昔新河有奇士登春其名氏宋氏苦吟未老頭先白落
拓辭家走千里辭家南去江陵城中有鵝池池水清卻愛

湖湘歸不得狎鵝自號鵝池生一身失路悲無與朝看鵝
來暮鵝去衡霍峯多煙霧深青山誰知埋骨處劫火滄桑
幾百春忽逢王宰有心人痛哭憐才求故蹟草元亭沒空
荆榛酌酒招魂向原隰陰風颯颯筵前入刻石記里表姓
名突有雙鵝碑上立鵝來相依不暫離署中還鑿天鵝池
無情有情誰得知君不見玉樓應召人姓李天上眞仙皆
才子文章有氣詩有神甯隨時數爲生死海翁有意逗精
靈特遣雙鵝報知己

用渭清韻再寄長馭

載酒金臺別故人書來隔歲感愁身卻看楊柳懷他日欲
寄梅花非我春野潤鵲田迷古井流澌瓠子悵前津顛毛
及爾垂垂老無計同歸住比鄰

秋夜讀道德經

一夜攜秋至蟲聲向暝歸暑消青瑣闥氣爽白蕉衣燒燭
差堪近攤書願不違同塵思老氏此道未云非

塞上吟

十石角弓鐵兩襠邊烽未靖守河湟男兒須向沙場死不
上山頭望故鄉

西閣晚眺

縱目高樓上幽奇一眺間斜陽薰遠樹積翠擁寒山勝地
堪長住浮生不自閒早朝同待漏促駕出禪關

中秋晚晴招孔東塘曹冲谷沈方舟寓中待月遲杜
承三不至

委巷泥深日向斜入門攜手興尤賒雲閒應得今宵月紅

溼能留小院花幸有青尊聯勝友那將白髮負年華樊川
杜子多才客金玉何心悵獨遐

吳任臣字志伊仁和人諸生康熙己未召試博學鴻詞

授檢討

詩話志伊長乙部之學輯十六國春秋
旁搜博采枝葉扶疏備薛歐二史之闕

洪氏園園在西溪明洪尚書鐘別業今已易主惟小邱尚存

秋憲當年賦遂初
蘼茅屋樹枝疏一溪香雪長攜屐滿
院蘿陰正讀書乍可山如人影澹無妨月照夜臺虛荒煙
此日迷花塢十笏模糊指舊廬

毛升芳字允大號乳雪一號質庵遂安人拔貢康熙己
未召試博學鴻詞授檢討有古獲齋竹枝詞

桐廬曉發

煙雨桐江放棹遲萬家雲樹曉參差荒城早市喧歸夢梵
閣殘鐘動遠思兩岸青山伍相廟一帆白水子陵祠呢鵲
似惜行人去淒切深林不自知

曹禾字頌嘉號峩眉江陰人康熙甲辰進士官內閣中
書己未召試博學鴻詞授編修歷官國子監祭酒有
未庵集

詩話頌嘉爲漁洋門下士詩列都門十子中偕盛誠
齋編漁洋精華錄其論詩語載分甘餘話當時號爲
都講自刊詩集篇帙甚富久佚不存沈歸愚已稱清
門淪落訪其詩不能多得十子詩略刊板分歸各家
傳本無多今亦不可得見惟江上詩鈔存
數十首大都寄意深婉不以藻繪求工

秋夜述懷

空林葉撼撼野犬聲狺狺徬徨忽四顧中夜感古人鴻濛
詎不樂烏用施經綸才賢既當權造化辭苦辛雷雨亦待

治雲物非空陳自有濟世功千古勞其身牽犢者誰子高蹈遺斯民

懷古

朝上太行山暮過金臺宿行路莫辭難人情多反覆往時金石交相期共式穀雲泥倏焉分顏色變亦速我本蓬蒿人自有升斗祿長揖謝王侯豈受僕隸畜鵷鸞自翱翔燕雀自棲伏長安多風波君子慎自牧

擬唐人宮怨

十五入深宮盈盈百花中芳年恆自惜旖旎當春風深宮日如電荏苒繁華變二九已當頭君王難識面粉黛易相親誰爲國色人昭陽歡讌月兼照翠眉顰長門人已老難比羊車草薄命不須嗟客顏我偏好

君馬黃

君馬黃我馬白二馬同逐我馬劣君行直上層霄去我馬
垂頭太行陌飢來日晚歷峻坂欲上不上筋骨折解卻金
羈縱大荒更與瑤池飽芻秣奔雲掣電須有時嘶向天門
會相及

病中書懷

秋色淹高枕蕭疏鎮日閒官貧人不問性冷病相關深雨
成空谷虛亭對遠山巖巒時入夢適興一躋攀

送周翼微入燕

良朋多北去江左欲羣空

周子叔陳其年計
甫草先後北游

破褐迎賓雁

虬髯捲朔風山川餘鉅鹿人物半新豐莫便將琴碎金臺
有俊雄

忽忽一杯酒茫茫萬里情
草間從放浪異地惜身名
詞賦能華國江湖已罷兵
憑君寄諸子努力致公卿

沙定峯喜予歸里疊韻見贈奉答

君歸粉樹里我出帝王州
各有千秋事誰爭萬戶侯
相看驚鬢髮此會足春秋
莫瀝憂時淚中年不任愁

癸丑除夜

寒氣盡隨春氣發狂飈送臘歲
將新薄攢爐火難溫酒徧
借朝衣不稱身吹角羽林閒
枕甲建牙朱邸待推輪蕭條
深巷嚴更永爆竹無聲犬吠頻

送魏相國假還

爭羨功名髮未皤乞身强健戀煙蘿
神仙宰相能兼少鐘鼎山林較孰多
采藥正逢黃獨長休糧重許赤松過
如何

解得蒼生望霖雨朝朝仰潤河

送友人還金陵

屑瑟秋風送客裝蕭條木落更神傷滿天欲雪尊無酒昨夜初寒雁叫霜馬足遠衝黃葉路吟聲徐入白鷗鄉江南景物關情甚煙雨秦淮夢裏長

送梵林上人東游兼柬錢黍谷先生陳其年同學

自笑詩多蔬筍氣近來常伴梵公吟秋潮紅蓼江邊棹夜雨青鐙世外心忽繫麻襪追去雁尙揮松柄落空碁東行儻遇陳驚座爲說相思苦滯淫

黎騫字子鴻號瀟雲江西清江人康熙己未召試博學鴻詞授檢討有玉堂集

鴻詞授檢討有玉堂集

七夕作

燈掩香雲墜寶花龍膏照影月籠紗尊前便是明河路一
訪支機又歲華

高詠字阮懷宣城人康熙己未召試博學鴻詞授檢討
有遺山堂詩

臨江中秋同諸公慧力寺泛舟回遂集愚樓玩月分
體各賦

丁丁蓮漏秋宵短銀屏華燭明高館瑤席清尊坐不遲芳
洲畫幟歸何緩入窗花霧香蕪濛珠簾四角垂玲瓏桂花
扶疏玉除冷菡萏披折金塘空千家羅幕蘭鐙淡明月正
過寒江東羣山寂寂鎖蒼翠碧漢金波光瀉地揮杯夜醉
使君樓題詩晚出城南寺美人接坐氣堂堂騏驎蹶裏爭
騰驤雄劍刺鐘爍紫電北斗挂戶森長芒二十五聲何太

早胡牀坐嘯重傾倒朱棟華櫬倚半空鳳絲雁柱愁清曉
霓裳仙子歸海宮沾衣涼露迴天風桃笙醉卧不知處東
方疊浪朝霞紅

宿青溪

青溪獨宿處遠火出江波醒酒思殘夢歸漁聞夜歌月斜
人語定舟曉棹聲多九子煙霄外勞生只暫過

游青原山寺

青原山半寺積雨長苔痕路轉遙聞水峯回直到門雲林
清磬落巖屋影堂存欲問無生偈孤雲起石根

過謝皋羽墓

許劍曾傳此地游豐碑遺墓尙荒邱龍髯墮海三宮淚馬
鬣封山萬古愁處士宅邊寒雨夜嚴陵灘下暮江流當年

慟哭聲猶在散作西臺檜柏秋

龍燮字理侯號石樓又號改庵望江人康熙己未召試

博學鴻詞授檢討擢中允改刑部主事有和蘇詩三

集

田山薑曰石樓之和蘇本於蘇之和陶和蘇而不泥於蘇亦猶蘇和陶而不泥於陶只自抒其胸所欲言而隱然與之

神行意會

詩話改庵左遷即署佗際以終詩多逸趣而不掩其神駿之氣阮亭山薑皆甚重之僅傳和蘇集自有句云吾去東坡千載後和詩只是笑談餘爲周爲蝶渾忘卻此是南華得意書又題顧俠君詩卷云子瞻韓白本同派今學杜者惟毛皮我持此論三十載世多夢夢君獨知可見其旨趣矣

卽事

次王定國

載筆相如已倦游甘泉書上不曾收挂冠敢道辭神武抗疏非同乞越州一葉宦沈滄海裏雙扉家在碧江頭遙知

白髮低垂甚北望眞牽萬里愁

歲暮雜感

荊州

寒夕聊危坐幽懷自默存夢隨烏鵲影書到鵲鵲原醫卜
同官守樵漁失舊村淒涼十年事閒對尺牘論
迢遞鄉關路微茫宦海沙乞身原李密杜口已田巴晚景
催黃耆春觴泛紫霞三公猶不易豈戀此蟲蝦

尙能容懶拙疇復較崇卑翮健搏風易花寒映日遲何心
憂塞馬無計指牀龜好學柴桑令長吟歸去詞

不必論奇節虛名亦弁髦風流三語掾貴勢五陵豪抗疏
還誰在求衣祇獨勞子雲終寂寂未擬廣離騷

高子爲予繪山堂圖覺湖山煙樹宛然目中賦答以

此入峽

卑微今不偶與異舊曾探苦戰嗟奔北遺經抱指南王元

書數十篇魏知古曰五經指南也沈香雖召白柳汁不成藍自幸窺中祕

翻移列簿參何年垂紫綬畏路過黃龕詎慕疲揚戟還愁

放屈潭腰支從曲折唾罵只包含杯底狂歌減燈前瘦影

麋園林宜腐朽廊廟富梗相止有琴書載甯須左右驂德

公仍喚婦元亮亦攜男粗解炊雞黍應教種橘柑優哉聊

卒歲逝矣會投簪白恰遯東客青牛柱下卧家山猶夢想

尺幅竟濡涵妙手揮霜兔華箋奪雪蠶江流森石壁峯頂

踞茅菴釣舫纔如葉窠樽略似甌別開邱壑面一洗澗林

慙負郭荒田在升堂曲徑諳當楣縣鳳字中爲勅書堂開牖接

雞談風月尋常有禽魚老癖耽壺天留歲月堂之西爲黛閣曰壺隱

色想煙嵐堂後遠山亭爲素君建也細著丹青寫如逢異寶貪蛟騰空

鰓鰓鶻起掃鶉鷃失路迴狂阮臨池挽眇堪百金奚足壽
杯酒莫辭酣他日扁舟過鱸肥荻筍甘

集趙給諫恆夫寄園同玉峯先生作

聚星堂雪詩

暝風吹綠宮槐葉開徧東園幾株雪一杯招我游寄園曲
徑迴廊頗幽絕我別黃門垂十載不知髯霜腰半折今夕
何夕飲最懽白紵歌闌紅燭滅郎君紫綬映斑衣二聞擢
濟甯道
渤海金鼇已曾挈喜看君家世珥貂爛醉奚辭生眼纈賓
客俱從壁上觀據榻高談若霏屑徵江少宰舊知我歲寒
肯作風花瞥問余一向坐詩窮宜瘦而肥又何說攬衣大
笑上馬歸尙有支貧骨如鐵

送汪初思郎中還茗溪

答孔殷父
問買田

同舍諸郎鬪翾好惟君粹然仍古道幾回執手立班行憐

余舊視明光草三年左官顏色盡只有詩腸未枯槁追和
蘇公千載下得句還愁公壓倒君攜一帙坐夜窗細讀微
吟頗煩惱一坏未掩松柏陰君乞假歸葬驪珠中墮愈傷心時有
愛子之戚以茲浩然拂衣去豈顧旦晚腰垂金眼看雲鶴高飛
起歸鴻我亦差堪擬小舟如葉過菰城同看西湖花十里

詠史 看潮

自古牛刀恥割雞匣中三尺氣如霓馮生只爲魚彈鋏更
比雞鳴狗盜低

謝傳兒曹亦鬪雞投鞭眞可斷虹霓休誇決勝東山墅只
爲苻堅下子低

車駕北征百官送於土橋 文殊普賢

何代無征伐威容異往年霓旌將霧掃羽騎若雲連日繞

飛龍御山開飲馬泉狼居胥勒石扈從有羣賢
萬里雖荒服宵衣慮自深不爲空幕計將啟屬蕃心壯士
思先入崇朝有捷音自除三孽後拊恤到如今

寓意

邸園
留題

長門夜坐倚薰籠不惜揮金買賦工老去婕妤誰記憶祇
攜紈扇立秋風

邵遠平字戒三號戒庵仁和人康熙甲辰進士由主事
累官光祿寺少卿己未召試博學鴻詞授侍讀遷詹
事府少詹事有戒庵詩

遲梁藥亭孝廉不至

高士聞人說南中有伯鸞才名齊鄴下詩句滿長安近郭
相過易停舟一見難從來多閉戶不肯累豬肝

湖口阻風

南北將行李炎風朔雪天
敝裘寒日下孤枕遠江邊
霽色開仍閉濤聲去復旋
倚舫方悵望兒女隔殘年

嚴繩孫字蓀友號藕漁無錫人諸生康熙己未召試博

學鴻詞授檢討歷官中允有秋水集

詩話蓀友詩宗黃初建安近體出入溫李蔚茂而婉麗爲同時姜宸英葉方霽吳綺所重王漁洋亦謂其冲融恬易鮮矯激之言聖祖嘗以布衣四人問內直諸臣卽李因篤朱彝尊及嚴姜也後公卿舉鴻博姜獨不與試省耕詩擢五十人由布衣與選者四蓀友與焉是日疾詩已不錄上特令授檢討旣而乞骸歸自號藕漁漁人杜門不出築堂曰雨青草堂亭日佚亭晚歲有以詩文畫請者概不應卒年八十

秋日雜感

潤州西望大江通正憶金焦似畫中
城郭曉連瓜步雨帆檣春滿海門風
何年地坼分吳會終古潮平見禹功
近說

東南多戰壘車書回首幾時同

秣陵宮闕舊神州桃葉聽歌記昔游紫禁月沈瓊樹夕滄
江楓冷石城秋天門無復交仙仗海氣眞成結蜃樓總是
興亡千古地莫教潮汐送閒愁

春雨曾過九曲隄雷塘官柳正萋迷飄來畫角纔江北數
去青樓是竹西極浦風驚聞馬渡重城鐙暗失烏棲試看
明月三分夜猶有簫聲雜鼓鼙

五湖秋色莽邱墟江介悲風尙羽書解語莫同秦吉了端
憂眞似魯爰居火旗錦纜終何事白骨青烽一醉餘側足
橫流羣盜在乾坤何處有吾廬

渡江

京江春樹隔芊眠咫尺神靈意惘然青壁近迷山寺雨綠

地用余言四卷四二
三
蓑遙入海人煙江魚水闊難通市石燕風多不避船我欲
然犀照幽隱夢魂猶自怯潺湲

羈緒與留仙

止息知無地羈孤歎有身貧來眞喪我老至轉隨人白雪
他山夜黃梅故國春九關猶踞虎歲暮共沾巾
長懷知己意觸緒或無端醴去生猶在綈來叔尙寒我無
重暝席君有未彈冠豈不慰羈寂終歌行路難

始興道中

曲江江勢舊迴腸況復秋心對夕陽林氣帶霜猶隱郭水
痕侵岸欲平檣紅蘭解作依人笑紫桂重飄故國香差幸
此邦還有歲未勞陰雨念南荒

紅梅關北葉初飛九月炎方未授衣隻候晴江無女浣荒

村獨樹有神依南來郡邑明朝盡北首風波往事非誰向
當時問金鏡中原盡日走珠璣

晚晴簃詩匯卷四十二終